

王文公文集

九

王 氏 集

王文公文集卷第三十七

古詩

皇帝還大次憇安之曲樂章

歆安之曲樂章

歌元豐

元豐行

桃源行

食黍行

白溝行

老人行

幽谷引

相送行

効張籍

歎息行

開元行

陰漫漫行

塞翁行

一日歸行

梵天畫讚

維摩像讚

璨公信心銘

空覺義示周子真

蔣山鐘銘

樂章二首奉 勅撰

皇帝還大次憇安之曲樂章

有奕明堂萬方時會宗予聖考作帝之配樂
酌虞典禮從周制釐事既成於皇來暨

歆安之曲樂章

穆穆在堂肅肅在庭於顯辟公來相思成神
既歆止有聞惟馨錫我休嘉燕及群生

歌元豐

歌元豐十日五日一雨風麥行千里不見土
連山沒雲皆種黍水秧綿綿復多稌龍骨長
乾掛梁枳鱗魚出網蔽洲渚荻笋肥甘勝牛
乳百錢可得酒斗許雖非社日長聞鼓吳兒
踏歌女起舞但道快樂無所苦老翁塹水西
南流楊柳中間杙小舟乘興歌眠過白下逢
人歡笑得無愁

元豐行示德逢

四山脩脩映赤日田皆坼如龜兆出湖陰先

生坐草室看踏溝車望秋實雷蟠電掣雲滔
滔夜半載雨輸亭臯旱禾秀發埋牛尻死
更蘇肥莢毛倒持龍骨掛屋敖買酒澆客追
前勞三年五穀賤如水今見西成復如此元
豐聖人與天通千秋萬歲與此同先生在野
固不窮擊壤至老歌元豐

桃源行

望夷宮中鹿爲馬秦人半死長城下避時不
獨商山翁亦有桃源種桃者此來種桃經幾
春採花食實枝爲薪兒孫生長與世隔雖有

父子無君臣漁郎漾舟迷遠近花間相見因
相問世上那知古有秦山中豈料今爲晉聞
道長安吹戰塵春風回首一沾巾重華一去
寧復得天下紛紛經幾秦

食黍行

周公兄弟相殺戮李斯父子夷三族富貴常
多患禍嬰貧賤亦復難爲情身隨衣食南與
北至親安能常在側謂言黍熟同一炊歎見
隴上黃離離遊人中道忽不返從此食黍還
心悲

白溝行

白溝河邊蕃塞地送迎蕃使年年事蕃馬常
來射狐兔漢兵不道傳烽燧萬里鉏耰接塞
垣幽燕桑葉暗川原棘門灞上從兒戲李牧
廉頗莫更論

老人行

老人低心逐年少年少還爲老人調兩家挾
詐自相欺四海傷眞誰復誚翻手作雲覆手
雨當面論心背面笑古來人事已如此今日
何須論久要

幽谷引

雲翳翳兮谷之幽天將雨我兮田者之稠有
繩于防兮有畚于溝我公不出兮誰省吾憂
日暉暉兮山之下歲則孰兮收者糴吾收滿
車兮棄者滿筥誰吾與樂兮我公燕語山有
木兮谷有泉公與客兮醉其間芳可搴兮甘
可漱無壯無穉兮環公以笑公歸而醉兮人
則喜公好我州兮殆其肯止公歸不醉兮我
之憂豈其不懌兮將舍吾州公一朝兮去我
我歲歲兮來遊完公亭兮使勿毀以慰吾兮

歲歲之愁

相送行効張籍

一車南一車北身世忽忽俱有役憶昔論心
兩綢繆那知相送不得留但聞馬嘶覺已遠
欲望應須上前坂秋風忽起吹泥塵雙目空
回不見人

歎息行

官驅群囚入市門妻子慟哭白日昏市人相
與說囚事破家劫錢何處村朝廷法令亦寬
大汝罪當死誰云冤路傍年少歎息汝正觀

元元之子孫

開元行

君不聞開元盛天子糾合雋傑披茲倡幾年
辛苦補四海如得完好無疽瘡一朝寄託誰
家子威福顛倒那復理那知赤子徧愁毒祇
見狂胡倉卒起茫茫孤行西萬里偏仄歸來
竟憂死子孫險不失故物社稷陵夷從此始
由來犬羊著冠坐廟堂安得四鄙無豺狼

陰漫漫行

愁雲怒風相追逐青山滅沒滄江覆少留燈

火就空床更聽波濤圍野屋憶昨踏雪度長
安夜宿木瘤還苦寒誰去當春便妍暖十日
八九陰漫漫

塞翁行

塞翁少小壟上鋤塞翁老來能捕魚魚長如
人水滿眼桑柘死盡生芙蕖家家新堤廣能
築胡兒壯馬休南牧北風卷却波浪聲祇放
田車行輾輾

一日歸行

賤貧奔走食與衣百日奔走一日歸平生歡

意苦不盡正欲老大相因依空房蕭瑟施總
帷青燈半夜哭聲稀音容想像今何處地下
相逢果是非

梵天畫讚

梵天尚實厥乘孔雀雞知時語鈴戒沉濁皜
身黃衣於淨無著乃持赤幡歸趣正覺

維摩像讚

是身是像無有二相三世諸佛亦如是像若
取真實還成虛妄應持香花如是供養

讚璨公信心銘

汚彼有流載浮載沉爲可以濟一壺千金法
譬則水窮之彌深璨公所傳等觀初心

空覺義示周彥真

覺不徧空而迷故曰覺迷空不徧覺而頑故
曰空頑空本無頑以色故頑覺本無迷以見
故迷

蔣山鍾銘

於皇正覺訓用音聞肆作大鍾以警沉昏

王文公文集卷第三十七

王文公文集卷第三十八

古詩

秦始皇

漢文帝

戴不勝

臧倉

四皓

張良

韓信

叔孫通

司馬遷

東方朔

楊雄三首

楊劉

諸葛武侯

讀墨

讀三才事

老景

裴古人名

陸忠州

秦始皇

天方獵中原狐兔在所憎傷哉六孺王當此
執鳥膺搏取已掃地翰飛尚憑凌荆門跨蓬
萊以海爲丘陵勒石頌功德群臣助騁行舉
世不讀易但以刑名稱蚩蚩彼少子何用辨
堅冰

漢文帝

輕刑死人衆喪短生者偷仁孝自此薄哀哉
不能謀露臺惜百金灞陵無高丘淺恩施一

時長患被九州

戴不勝

昔在宋王所皆非薛居州區區一不勝辛苦
亦何求懷祿詎有耻知命乃無憂此士自可
怜能復識此不

臧倉

位在萬乘師孟軻猶不遇豈云貧與賤世道
非吾趣意行天下福事忤油然去命也固有
在臧倉汝何與

四皓